

CHANGURRUAK.¹

Itz egiñ omen zuten
 Batzarre batean
 Changurruak atzerontz
 Joateko gañean;
 Ikusirik chit zala
 Modu itsusia,
 Eta dudarik gabe
 Chit lotsagarria.
 Nork bere umeari,
 Esan omen zuten,
 Erakutsi beaio
 Aurrerontz ibiltzen;
 Oitura au emanaz
 Jaiotzen danetik,
 Utzi gabe ematen
 Atzerontz pausorik.
 Biaramon goizetik
 Omen dira asten
 Umechoak aurrerontz
 Erabilli-arazten,
 Atzaparrak biguñak
 Dituzten artean,

Aurrerontz eragiñaz
 Atzerontz ordean.
 Ari dira onela
 Ziñez gurasoak
 Egunoro zuzentzen
 Umeen pausoak.
 Alferrikan egiten
 Dute alegiña,
 Eziñ garaitu dute
 Semechoen griña;
 Atzerontz ikustean
 Beren gurasoak,
 Umeak daramatzi
 Oien ejenploak.
 Argatik changurruak
 Gaur ere dabilta
 Beti atzerontz pauso,
 Sokagille gisa;
 Esaten digutela,
 Emak ejenploa
 Nai badek segitzea
 Ire lezioa.

(1) Samaniego-ren ipuia euskerara itzulia.